

**Tiada keperluan laksana PKPD di Kuching - Dr Noor Hisham  
Astro Awani  
15 April 2020  
Hasimi Muhamad,**

PUTRAJAYA: Ketua Pengarah Kesihatan Datuk Dr Noor Hisham Abdullah memaklumkan setakat ini tiada keperluan untuk melaksanakan Perintah Kawalan Pergerakan Diperketatkan (PKPD) di Kuching, Sarawak.

Katanya, kluster persidangan keagamaan di gereja tersebut masih terkawal dan Kementerian Kesihatan (KKM) sedang giat mengesan individu dan kontak rapat bagi mencegah penularan COVID-19.

Jelas beliau lagi, KKM masih menggunakan kaedah sama dalam mengesan kes indeks positif membabitkan kluster tersebut.

"Contoh kita akan cari indeks kes tersebut dan apabila kita dapat kesan indeks kes kita akan menjalankan pengesanan kontak rapat.

"Kes-kes tersebut setakat ini memang terkawal, jadi kita tak melaksanakan PKPD (di Kuching) tetapi kaedah ia sama untuk kita laksanakan di Semenanjung dan Sarawak.

"Apa yang penting adalah kita dapat mengesan sebab kita ada rekod persidangan tersebut berbeza dengan jemaah tabligh, kita tidak mempunyai rekod siapa yang hadir," katanya pada sidang media harian, di sini hari ini.

Sehubungan itu katanya, KKM akan terus melaksanakan pengesanan membabitkan persidangan gereja tersebut.

Setakat ini, sebanyak 117 kes positif COVID direkodkan membabitkan persidangan tersebut, dengan tiga kematian.

**© 2020 Astro Awani Network Sdn. Bhd.  
(535275-D) All Rights Reserved.**

Source: <http://www.astroawani.com/berita-malaysia/tiada-keperluan-laksana-pkpd-di-kuching-dr-noor-hisham-238514>